



Sumáriu Kazu
Tribunál Distritál Baukau
Novembru 2019

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 20

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b) Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika sira no artigu 36 kona-ba krime sira violénsia doméstika nian hanesan krime públiku)	13
Artigu 154 KP	Mau stratus ba kónjuje	3
Artigu 139 (g) KP no artigu 20 (1) hosi Lei Nú. 5/2017	Omisídiu agravadu no arma brankas	1
Artigu 146 KP no artigu 20 (1) hosi Lei Nú. 5/2017	Ofensa ba integridade fízika grave no arma brankas	1
Artigu 145 KP no artigu 20 (1) hosi Lei Nú.	Ofensa ba integridade fízika simples no arma brankas	1

5/2017		
Totál		20

2. Totál desizaun ne'ebé JSMP monitoriza: 17

Tipu Pena	Númeru
Pena prizaun (Artigu 66)	1
Pena multa (Artigu 67)	8
Suspensaun ba prizaun nia ezekusaun (Artigu 68 KP)	6
Suspensaun ba pena prizaun nia ezekusaun (Artigu 68 KP) ho regra konduta Artigu 70(g)	1
Suspensaun ba pena prizaun nia ezekusaun (Artigu 68 KP) - Omologa	1
Totál	17

3. Totál kazu sira ne'ebé adia tuir JSMP monitorizasaun : 0

4. Totál kazu ne'ebé sei kontinua prosesu tuir JSMP nia monitorizasaun: 3

B. Deskripsaun sumáriu ba desizaun kazu sira ne'ebé JSMP monitoriza:

1. Krime ofensa ba integridade física simples ho natureza violénsia doméstika

Nú. Prosesu	: 0060/19. BCBCV
Kompozisaun Tribunál	: Singulár
Juis	: Dr. José Quintão Soares Celestino
Prokuradór	: Dra. Remizia de Fátima da Silva
Defeza	: Dr. José Maria Caetano Guterres
Desizaun	: Pena prizaun fulan 3 suspende ba tinan 1

Iha 05 Novembru 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu SdC hasoru nia feen, iha Distritu Baukau.

Akuzasaun Prokuradór

Prokuradór akuza arguidu katak iha 24 Abril 2019, iha oras tuku 11:45 lezada no sira nia oan na'in rua ne'ebé sei menoridade atu ba vizita sira nia avo iha Munisípiu Suai, maibé arguidu la aseita. Ho nune'e, sira diskute malu no arguidu tebe dala ida iha lezada nia kotuk laran. Arguidu mós foti nuu kelen ida no baku dala rua iha lezada nia liman parte karuk no tenta buti lezada nia kakorok maibé la konsege buti tanba lezada baku ses tiha arguidu nia liman. Hafoin arguidu tuku dala ida iha lezada nia ulun. Lezada ba halo tratamentu iha Pradet Baukau.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira hotu ne'ebé prokuradór imputa ba nia no deklarata katak arguidu la'os la aseita lezada no oan sira ba vizita sira nia avo maibé momentu ne'ebá sira nia oan ida moras hela. Arguidu mós foin primeiravés mai hatan iha tribunál no perante tribunál arguidu promete katak sei la komete tan krime hasoru lezada no membru família sira seluk iha futuru. Arguidu arrepende ninia hahalok ne'e no to'o agora la baku ona lezada.

Aleinde ne'e, lezada mós kontinua konfirma faktu sira iha akuzasaun no reforsa arguidu nia deklarasaun katak sira di'ak malu ona no to'o agora arguidu la baku ona lezada.

Alegasaun finál

Prokuradór haktuir katak bazeia ba arguidu nia konfiksaun no lezada nia konfirmasaun ba faktu sira iha akuzasaun, provadu katak arguidu komete duni krime hasoru lezada. Tanba ne'e, mezmu sira di'ak malu ona maibé husu atu tribunál nafatin foti medida ne'ebé forte hodi prevene arguidu la repete tan ninia hahalok ne'e iha futuru. Bazeia ba prova no konsiderasaun ne'e, husu ba tribunál atu kondena arguidu ho pena prizaun fulan sia suspende ba tinan ida.

Entretantu, defeza konsidera arguidu konfesa, koopera di'ak ho justisa no primeiravés mai tribunál. Ho nune'e, husu ba tribunál atu aplika pena ne'ebé justu ba arguidu.

Desizaun

Depoide avalia faktu hotu, tribunál prova katak arguidu tebe dala ida iha lezada nia kotuk laran, foti nuu kelen ida no baku dala rua iha lezada nia liman parte karuk. Tribunal mós prova katak arguidu tenta atu buti lezada nia kakorok maibé la konsege buti tanba lezada baku ses tiha arguidu nian liman, hafoin arguidu tuku dala ida iha lezada nia ulun. Bazeia ba faktu provadu sira ne'e no tetu mós sirkunstánsia atenuante sira husi kazu ne'e hanesan arguidu konfesa, arrepende ninia hahalok no to'o agora la baku ona lezada inklui mós arguidu foin primeiravés mai hatan iha tribunál, nune'e tribunál kondena arguidu ho pena prizaun fulan tolu suspende ba tinan ida.

2. Krime maus tratus ba kónjuje

Nú. Prosesu	: 0076/18. BCSIC
Kompozisaun Tribunál	: Koletivu
Juis	: Dr. José Gonçalves, Dra. Florencia Freitas no Dr. José António de Jesus Escurial da Silva Faria
Prokuradór	: Dr. Remizia de Fátima da Silva
Defeza	: Dr. José Maria Caetano Guterres
Desizaun	: Pena prizaun tinan 2 suspende ba tinan 2

Iha 07 Novembru 2019, Tribunál Distritál Baukau prezide julgamentu leitura akordaun ba krime maus tratus ba kónjuje ne'ebé envolve arguidu OEF hasoru nia feen, iha Distritu Baukau.

Akuzasaun Prokuradór

Prokuradór akuza katak iha 26 Dezembru 2018, iha oras tuku 20:30 kalan, arguidu tebe dala ida iha lezada nia sorin loos, rasta lezada nia fuuk no hanehan ba rai, hafoin tuku dala tolu iha kanuruk. Antes akontesimentu ida ne'e, iha Jullu 2018, arguidu tebe dala barak iha lezada nia kabun kidun to'o lezada monu ba rai.

Prokuradór akuza arguidu kontra artigu 154 KP kona-ba maus tratus ba kónjuje ho moldura penál tinan 2 to'o tinan 6 no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarata katak desde forma família ho lezada iha 2017 no iha ona oan na'in ida, foin primeiravés mai hatan iha tribunál. Arguidu mós deklarata katak arrepende ninia hahalok, di'ak malu ona ho lezada no to'o agora la baku ona lezada. Arguidu mak sustenta ninia família.

Aleinde ne'e, lezada mós kontinua konfirma faktu sira iha akuzasaun no hatutan katak antes agresaun iha 26 Dezembru 2018, arguidu no lezada diskute malu kona-ba STNK ne'ebé sira buka la hetan no depoisde arguidu halo agresaun, lezada deside ba hela tiha iha uma Mahon durante loron tolu. Entretantu akontesimentu sira iha Jullu 2018, lezada hatutan katak arguidu sempre la'o sai husi uma bainhira lezada sei oan nurak nune'e lezada ko'alia ba arguidu no ikus arguidu halo agresaun hasoru lezada.

Alegasaun finál

Prokuradór haktuir katak arguidu provadu komete faktu sira iha akuzasaun bazeia ba arguidu nia konfisaun no lezada nia konfirmasaun ba iha faktu sira. Tanba ne'e, konsidera arguidu halo duni tratamentu aat hasoru lezada maibé tanba arguidu arrepende ninia hahalok no to'o agora la repete ninia hahalok ne'e, husu ba tribunál atu kondena arguidu ho pena mínimu hosi moldura penál ba krime ne'e.

Entretantu, defeza haktuir katak arguidu konfesa faktu sira ne'ebé nia komete, arguidu arrepende ona ninia hahalok, di'ak malu ona ho lezada, arguidu mak úniku ema ne'ebé sustenta nia família. Tanba ne'e, husu ba tribunál atu aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguidu tebe dala ida iha lezada nia sorin loos, rasta lezada nia fuuk no hanehan ba rai, hafoin arguidu tuku dala tolu iha kanuruk. Tribunál mós

prova katak iha tinan ida antes akontesimentu ne'e, arguidu tebe dala barak iha lezada nia kabun kidun to'o lezada monu ba rai. Bazeia ba faktu provadu sira ne'e no tetu mós sirkunstánsia sira hotu, tribunál kondena arguidu ho pena prizaun tinan rua suspende ba tinan rua.

3. Krime arma brankas no krime ofensa ba integridade fízika simples

Nú. Prosesu : 0007/17. LALPL
Kompozisaun Tribunál : Koletivu
Juis : Dra. Florencia Freitas, Dra. Ersília de Jesus no Dr. José António de Jesus Escurial da Silva Faria
Prokuradór : Dr. Remizia de Fátima da Silva
Defeza : Dr. Sidónio Maria Sarmiento
Desizaun : Pena prizaun tinan 3 suspende ba tinan 3 no omologa

Iha 07 Novembru 2019, Tribunál Distritál Baukau prezide julgamentu leitura akordaun ba krime arma brankas no ofensa ba integridade fízika simples ne'ebé envolve arguidu Juvinal Matias hasoru lezadu Eduardo Tezeira, iha Sub-Distritu Lospalos, Distritu Lautem.

Akuzasaun Prokuradór

Prokuradór akuza arguidu katak iha 20 Juñu 2017, iha oras tuku 20:00 kalan, lezadu rona arguidu hakilar ho lian maka'as iha portaun loja nia oin katak “imi *karyawan* sira ne'e sai mai ita oho malu”. Iha tempu hanesan arguidu mós dudu portaun maka'as. Ho nune'e, lezadu hakbesik-an ba iha portaun maibé derepente arguidu uza diman ida sona kedas iha lezadu nia inus halo kanek no ran rezulta lezadu oin nakukun no monu ba rai.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no kontra artigu 2(1 letra b) no artigu 20(1) hosi Lei Nú. 5/2017 kona-ba krime arma brankas.

Antes tama produsaun ba prova sira, bazeia ba artigu 262 Kódigu Prosesu Penál (KPP) kona-ba tentativa konsiliaun, tribunál halo tentativa konsiliaun ba arguidu no lezadu relasiona ho krime ofensa ba integridade fízika simples tanba kazu ne'e klasifika nu'udar krime semi-públiku no nia prosedimentu depende ba keixa.

Iha prosesu konsiliaun ne'e, arguidu husu deskulpa ba lezadu no promete sei la repete ninia hahalok ne'e iha futuru. Ho nune'e, lezadu hakarak deziste tiha nia keixa relasiona ho krime ofensa ba integridade fízika simples. Bazeia ba konkordansia husi parte rua ne'e, tribunál omologa tiha keixa ne'e. Entretantu ba krime arma brankas, tribunál kontinua halo prosesu julgamentu.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarata katak arrepende ninia hahalok no to'o agora arguidu la komete tan kualker krime hasoru ema seluk. Arguidu mos foin primeiraves komete krime no nu'udar agrikultor ne'ebe nia rezultadu hodi sustenta deit ba han.

Aleinde ne'e, lezadu kontinua konfirma faktu sira iha akuzasaun no deklarata katak momentu ne'eba lezadu nu'udar traballador iha loja Salvasaun bainhira arguidu komete krime hasoru nia ne'e.

Alegasaun final

Prokurador konsidera arguidu provadu komete faktu sira iha akuzasaun. Tanba ne'e, husu ba tribunál atu kondena arguidu ba pena prizaun ne'ebe minimu hosi moldura penal ba krime ne'e.

Aleinde ne'e, defeza husu ba tribunál atu konsidera sirkunstansia atenuante sira hanesan arguidu foin primeiraves mai hatan iha tribunál no arrepende ninia hahalok. Kona-ba aplikasaun pena, defeza konkorda ho alegasaun prokurador nian.

Desizaun

Depoizde avalia faktu hotu, tribunál prova katak arguidu uza diman ida sona iha lezadu nia inus to'o ran. Maski sasan (diman) ne'e estadu bandu ona maibe arguidu uza hodi sona lezadu. Bazeia ba faktu provadu sira ne'e no tetu mos sirkunstansia atenuante husi kazu ne'e hanesan arguidu konfesa, arrepende ninia hahalok, foin primeiraves mai hatan iha tribunál, nune'e tribunál kondena arguidu ho pena prizaun tinan tolu suspende ba tinan tolu.

4. Krime maus tratus ba konjuje

Nú. Prosesu	: 0012/19. VQSIC
Kompozisaun Tribunál	: Koletivu
Juis	: Dra. Florencia Freitas, Dra. Ersília de Jesus no Dr. José António de Jesus Escurial da Silva Faria
Prokurador	: Dr. Domingos Gouveia Barreto
Defeza	: Dr. José Maria Caetano Guterres
Desizaun	: Pena prizaun tinan 3 suspende ba tinan 3

Iha 07 Novembru 2019, Tribunál Distritál Baukau prezide julgamentu leitura akordaun ba kazu maus tratus ba konjuje ne'ebe envolve arguidu XdC hasoru nian feen, iha Distritu Vikeke.

Akuzasaun Prokuradór

Prokuradór akuza katak iha 23 Abril 2019, oras tuku 18:00 lokraik, lezada husu katana ba arguidu atu fera nuu maibé arguidu la preokupa no buti kedas lezada nia kakorok. Iha loron tuir mai, iha 24 Outubru 2019, oras tuku 07:00 dadeer, arguidu no lezada diskute malu fali kona-ba akontesimentu antes ne'e no lezada lees arguidu nia faru. Ho nune'e, arguidu fila tuku dala ida iha lezada nia matan fukun parte loos no tebe dala ida iha lezada nia kelen parte karuk.

Prokuradór akuza arguidu kontra artigu 154 KP kona-ba maus tratus ba kónjuje ho moldura penal tinan 2 to'o tinan 6 no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu hili direitu nonook. Entretantu, lezada kontinua konfirma faktu sira iha akuzasaun no deklarara katak depoisde akontesimentu ne'e, sira di'ak malu fali no to'o agora arguidu la baku ona lezada. Lezada mós deklarara katak arguidu foin primeiravés baku lezada.

Alegasaun final

Prokuradór haktuir katak mezmú arguidu hili direitu nonook maibé husu atu apresia arguidu nia deklarasaun iha ministériu públiku ne'ebé rekoñese ninia hahalok hasoru lezada no iha produsaun ba prova mós lezada kontinua konfirma faktu sira iha akuzasaun. Aleinde ne'e, presiza halo prevensaun ida ho regirozu ba arguidu sira nia hahalok nu'udar edukasaun ida ba comunidade sira nune'e bele reduz krime maus tratus hasoru sira nia kónjuje iha sociedade tanba volume krime ne'ebé ho tratamentu krúel hasoru lezada sira kontinua akontese bei-beik. Tanba ne'e, husu ba tribunál atu kondena arguidu ba pena prizaun tinan rua suspende ba tinan rua.

Entretantu defeza haktuir katak mezmú arguidu hili direitu nonook maibé lezada mós deklarara katak depoisde akontesimentu ne'e, sira di'ak malu fali no to'o agora arguidu la baku ona lezada. Tanba ne'e, husu ba tribunál atu aplika pena ne'ebé justu ba arguidu.

Desizaun

Depoisde avalia faktu hotu, tribunál prova katak arguidu buti lezada nia kakorok, tuku dala ida iha lezada nia matan fukun parte loos no tebe dala ida iha lezada nia kelen parte karuk. Bazeia ba faktu provadu sira ne'e no tetu mós ba sirkunstánsia atenuante sira husi kazu ne'e, hanesan arguidu arrende ninia hahalok no to'o agora ba repete ninia hahalok, ho nune'e tribunál kondena arguidu ho pena prizaun tinan tolu suspende ba tinan tolu.

5. Krime ofensa ba integridade física simples ho natureza violénsia doméstika

Nú. Prosesu	: 0004/19. VQWCB
Kompozisaun Tribunál	: Singulár
Juis	: Dr. José António Jesus Escurial da Silva Faria
Prokuradór	: Dr. Domingos Gouveia Barreto
Defeza	: Dr. José Maria Caetano Guterres

Desizaun

: Pena multa úniku US\$30.00

Iha 07 Novembru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve AS hasoru nia feen no nia oan na'in rua (mane no fetu), iha Distritu Vikeke.

Akuzasaun Prokuradór

Prokuradór akuza katak 01 Marsu 2019, iha oras tuku 16:00 lokraik, arguidu nia fahi haksoit sai hosi luhan. Ho nune'e, arguidu hirus no foti mangera baku dala ida iha arguidu nia oan mane nia ain kabun parte loos no baku dala ida iha arguidu nia oan fetu nia ain kabun parte karuk. Tanba ta'uk, arguidu nia oan fetu ne'e halai tiha ba iha arguidu nia feen. Maibé arguidu nafatin uza mangera refere no baku tan nia feen dala ida iha ain parte karuk no tuku dala ida iha ulun.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu admite katak faktu sira ne'ebé prokuradór akuza ba arguidu ne'e loos hotu no deklarata katak arrepende ninia hahalok. Arguidu di'ak malu ona ho lezada no to'o agora la baku ona lezadu/a sira. Aleinde ne'e, arguidu mós deklarata katak durante moris hamutuk arguidu foin primeiravés komete krime hasoru lezadu/a sira. Arguidu nu'udar mestre ho vensimentu kada fulan US\$150.00.

Aleinde ne'e, lezadu/a sira mós kontinua konfirma faktu sira iha akuzasaun inklui deklarasaun arguidu nian katak to'o agora arguidu la baku ona sira.

Alegasaun finál

Prokuradór haktuir katak arguidu provadu komete faktu sira iha akuzasaun tanba arguidu konfesa ninia hahalok no lezadu/a sira konfirma nafatin faktu sira. Ho nune'e, prova katak arguidu komete krime tolu tanba hasoru lezada na'in tolu. Bazeia ba prova ne'e, husu ba tribunál atu kondena arguidu ba kada krime ho pena prizaun fulan tolu maibé akumulata tiha pena tolu ne'e no husu ba tribunál atu aplika pena únika fulan sia suspende ba tinan ida.

Entretantu, defeza haktuir katak arguidu konfesa faktu sira ne'ebé nia komete, arguidu arrepende ninia hahalok, di'ak malu ona ho lezadu/a sira, arguidu mak úniku sustenta nia família. Tanba ne'e, husu ba tribunál atu aplika pena ne'ebé adekua ba arguidu.

Desizaun

Depoisde avalia faktu hotu, tribunál prova katak arguidu uza mangera baku dala ida iha oan mane nia ain kabun parte loos, baku dala ida iha oan fetu nia ain kabun parte karuk no baku dala

ida iha nia feen nia ain parte karuk no tuku dala ida iha ulun. Bazeia ba faktu provadu sira ne'e no tetu mós ba sirkunstánsia sira hotu, tribunál kondena arguidu ho pena multa úniku US\$30.00 ne'ebé arguidu sei selu 0.50 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la selu pena multa refere.

6. Krime ofensa ba integridade fízika simples ho natureza violénsia doméstika

Nú. Prosesu : 0009/19. BCEVN
Kompozisaun Tribunál : Singulár
Juis : Dr. José Quintão Soares Celestino
Prokuradór : Dr. Bartolomeu de Araújo
Defeza : Dr. José Maria Caetano Guterres
Desizaun : Pena multa US\$15.00

Iha 13 Novembru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SS hasoru nia feen, iha Distritu Baukau.

Akuzasaun Prokuradór

Prokuradór akuza arguidu katak iha 17 Abril 2019, iha oras tuku 22:00 kalan, lezada nono hela bee manas iha dapur laran. Arguidu tama tuir lezada ba iha dapur laran no fakar tiha bee manas refere. Lezada foti banku ida atu tuur maibé arguidu rasta sai lezada hosi dapur laran halo lezada monu ba rai. Arguidu kontinua kaer lezada nia liman no rasta tama ba kuartu laran.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu ne'ebé mak prokuradór imputa ba nia no deklarata katak sira moris hamutuk kleur ona to'o agora idade idozu ona. Maski oan laiha maibé iha oan hakiak, mane na'in rua. Arguidu foin primeiravés baku lezada no primeiravés mai hatan iha tribunál. Arguidu mós deklarata katak arrepende ninia hahalok ne'e, di'ak malu ona ho lezada no promete sei la repete ninia hahalok ne'e iha futuro. Arguidu serbisu hanesan agrikultór ho vensimentu US\$60.00 kada fulan hodi sustenta nia família.

Aleinde ne'e, lezada kontinua konfirma faktu sira iha akuzasaun no deklarata katak arguidu nia konduta ne'e rezulta lezada nia liman parte karuk no isin lolon sira moras hotu. Lezada mós konfirma ho deklarasaun arguidu nian katak sira di'ak malu ona, foin primeiravés baku lezada no to'o agora la baku ona lezada.

Alegasaun final

Prokuradór konsidera faktu sira iha akuzasaun provadu. Ho nune'e, prokuradór husu ba tribunál atu fó pena admoestasaun ba arguidu nu'udar pena ne'ebé adekuaudu liu ba arguidu tanba arguidu no lezada moris hamutuk kleur no to'o idozu ona. Arguidu mós arrepende ona ninia hahalok, foin primeiravés baku lezada no di'ak malu ona lezada.

Aleinde ne'e, defeza konkorda ho prokuradór nia alegasaun tanba iha produsaun prova sira arguidu mós nu'udar ema úniku ne'ebé sustenta ninia família.

Desizaun

Depoizde avalia faktu sira, tribunál prova katak arguidu rasta sai lezada hosi dapur laran halo lezada monu ba rai no kontinua kaer lezada nia liman rasta ba kuartu laran. Tribunál tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál no di'ak malu ona ho lezada, ho nune'e tribunál kondena arguidu ho pena multa US\$15.00 ne'ebé arguidu sei selu 0.50 kada loron durante loron 30. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

7. Krime ofensa ba integridade física simples ho natureza violénsia doméstika

Nú. Prosesu	: 0040/18. VQSIC
Kompozisaun Tribunál	: Singulár
Juis	: Dr. José Gonçalves
Prokuradór	: Dr. Bartolomeu de Araújo
Defeza	: Dr. António Fernandes
Desizaun	: Pena multa US\$30.00

Iha 19 Novembru 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AdS hasoru nia feen, iha Distritu Vikeke.

Akuzasaun Prokuradór

Prokuradór akuza katak iha 29 Outubru 2018, iha oras tuku 09:30 dadeer, arguidu ho nia família foin fila hosi Same, bainhira to'o uma iha Vikeke, arguidu ho lezada tama kuartu laran no diskute malu kona-ba lezada la atende arguidu nia telefone bainhira arguidu ho nia família sira iha dalan atu mai sira nia uma iha Vikeke. Ho nune'e, arguidu tuku dala tolu iha lezada nia kotuk laran. Arguidu no lezada kontinua diskute malu to'o iha veranda no arguidu hanehan lezada ba hadak leten.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira hotu ne'ebé prokuradór akuza hasoru nia no deklarata katak depoisde liutiha loron tolu sira di'ak malu filafali. Arguidu mós deklarata katak arrepende ninia hahalok ne'e no to'ogora la baku ona lezada. Aleinde ne'e, desde forma família iha tinan 2008, iha oan na'in lima, arguidu foin primeiravés baku lezada.

Nune'e mós lezada kontinua konfirma faktu sira iha akuzasaun inklui konfirma ho arguidu nia deklarasaun katak arguidu foin primeiravés baku lezada no to'ogora arguidu la baku ona lezada.

Alegasaun finál

Prokuradór haktuir katak bazeia ba arguidu nia konfiksaun no lezada nia konfirmasaun ba faktu sira iha akuzasaun, provadu katak arguidu halo agresaun hasoru lezada. Tanba ne'e, mezmú arguidu no lezada di'ak malu ona maibé tribunál tenke foti medida ne'ebé forte hodi prevene arguidu nia hahalok iha futuru. Tanba ne'e, husu ba tribunál atu fó justisa ba arguidu.

Entretantu, defeza konsidera arguidu konfesa, arrepende ninia hahalok, koopera di'ak ho justisa, primeiravés mai tribunál no arguidu mak sustenta nia família. Ho nune'e, husu ba tribunál atu aplika pena ne'ebé justu hodi garantia arguidu ho nia membru família nia moris iha futuru.

Desizaun

Depoisde avalia faktu sira, tribunál prova katak arguidu tuku dala tolu iha lezada nia kotuk laran no hanehan lezada ba hadak leten. Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan tribunál no di'ak malu ona ho lezada, ho nune'e tribunál kondena arguidu ho pena multa US\$30.00 ne'ebé arguidu sei selu 0.50 kada loron durante loron 60. Bainhira arguidu la selu pena multa ne'e, arguidu sei kumpri iha prizaun durante loron 40 prizaun, nu'udar pena alternativa.

8. Krime ofensa ba integridade fízika simples ho natureza violénsia doméstika

Nú. Prosesu	: 0056/19. BCBCV
Kompozisaun Tribunál	: Singulár
Juis	: Dra. Ersilia de Jesus
Prokuradór	: Dr. Remizia de Fátima da Silva
Defeza	: Dr. Sidónio Maria Sarmiento
Desizaun	: Pena prizaun fulan 3 suspende ba tinan 1 ho regra ba konduta

Iha 19 Novembru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MP hasoru nia feen, iha Distritu Baukau.

Akuzasaun Prokuradór

Prokuradór akuza arguidu katak iha 24 Abril 2019, iha oras tuku 20:00 kalan, arguidu tebe dala ida iha lezada nia ulun halo lezada monu ba rai no ulun kona parede. Bainhira lezada hamrik husi rai, arguidu kaer lezada nia liman no riba lezada ba rai. Antes kazu ne'e akontese, sira nia oan monu rezulta ulun kanek tanba halai tuir lezada ne'ebé atu ba fui bee. Arguidu no lezada lori kedas sira nia oan ne'e ba halo tratamentu iha Ospital Referál Baukau no bainhira fila ba uma, sira diskute malu no arguidu halo agresaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho moldura penal to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa ninia hahalok no deklara katak foin primeiravés baku lezada no mós foin primeiravés hatan iha tribunál. Arguidu mós deklara katak sira di'ak malu ona no to'o agora la baku ona lezada. Arguidu nu'udar ajudante ba bada'en sira hodi sustenta nia família.

Aleinde ne'e, lezada kontinua konfirma faktu sira iha akuzasaun no deklara katak sira di'ak malu ona no to'o agora la baku ona lezada. Lezada hatutan katak lezada hela ho nia inan-aman sira iha foho no arguidu hela hamutuk ho nia oan husi feen primeiru iha Baukau hodi serbisu. Arguidu vizita lezada no nia oan na'in tolu iha kada semana nia rohan.

Alegasaun final

Prokuradór konsidera arguidu provadu komete krime hasoru nia feen ne'ebé tuir loloos nu'udar parseira hodi kuidadu sira nia oan sira la'os uza fali violénsia físiku hasoru lezada. Arguidu nia konduta ne'e kontra lezada nia vontade no halo lezada hetan prejuizu. Tanba ne'e, husu ba tribunál atu kondena arguidu ho pena prizaun fulan neen suspende ba tinan ida fulan neen.

Entretantu, defeza husu ba tribunál atu konsidera sirkunstánsia atenuante sira hanesan arguidu koopera ho justisa, foin primeiravés baku lezada, arrepende ninia hahalok no di'ak malu ona ho lezada to'o agora. Tanba ne'e, husu ba tribunál atu aplika pena ne'ebé kmaan liu ba arguidu.

Desizaun

Depoide avalia faktu sira hotu, tribunál prova katak arguidu tebe dala ida iha lezada nia ulun, rezulta lezada monu ba rai no ulun kona parede. Tribunál mós prova katak bainhira lezada hader husi rai, arguidu kaer lezada nia liman no riba lezada ba rai. Bazeia ba prova sira ne'e no tetu mós sirkunstánsia atenuante sira hanesan arguidu foin primeiravés mai hatan iha tribunál no di'ak malu ona ho lezada to'o agora, tribunál kondena arguidu ho pena prizaun fulan tolu suspende ba tinan ida no aplika regra ba konduta atu arguidu apresenta-an periodikamente fulan ida dala ida durante fulan tolu iha tribunál.

9. Krime ofensa ba integridade fizika simples ho natureza violénsia doméstika

Nú. Prosesu : 0065/19. BCBCV
Kompozisaun Tribunál : Singulár
Juis : Dra. Ersilia de Jesus
Prokuradór : Dr. Bartolomeu de Araújo
Defeza : Dr. Grigório Maria Lourdes de Lima
Desizaun : Pena multa US\$120.00

Iha 19 Novembru 2019, Tribunál Distritál Baukau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu JdC hasoru nia feen, iha Distritu Baukau.

Akuzasaun Prokuradór

Prokuradór akuza arguidu katak iha 01 Maiu 2019, iha oras tuku 14:00 lokraik, arguidu tuku lezada dala tolu iha kabaas parte karuk no tuku dala tolu iha kabaas parte loos. Arguidu foti ai-kabelak natoon ida no baku dala rua iha lezada nia ain kabun. Hafoin, arguidu tuku dala ida iha lezada nia kanuruk no tebe dala barak iha kotuk laran. Antes agresaun ne'e, arguidu haruka lezada ne'ebé kole tanba foin fila hosi merkadu atu te'in.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu sira iha akuzasaun no deklarata katak arrepende ninia hahalok. Arguidu mós deklarata katak di'ak malu ona ho lezada perante família rua ne'ebé lezada nia família mai hosi Oekusi. Arguidu hatutan katak desde forma família ho lezada iha 2011, iha ona oan na'in rua, arguidu foin primeiravés baku lezada. Arguidu promete la baku tan ona lezada iha futuro.

Aleinde ne'e, lezada kontinua reforsa faktu balun iha akuzasaun no deklarata tan katak arguidu baku dala neen iha lezada nia liman kabun parte loos no karuk no ho ai-kabelak natoon ida baku dala rua iha ain tuur. Lezada mós deklarata katak arguidu tuku dala ida iha lezada nia ulun parte kotuk, tebe dala ida iha kidan no uza ain sikun fai dala ida iha lezada nia kotuk laran. Lezada ba hela tiha iha uma mahon Baukau durante semana rua hafoin arguidu ba husu deskulpa no lori lezada fila ba uma. Lezada hatutan katak arguidu foin primeiravés baku lezada no to'o agora la baku ona lezada.

Alegasaun finál

Prokuradór haktuir katak bazeia ba arguidu nia konfiksaun no lezada nia konfirmasaun ba faktu sira, arguidu provadu komete krime hasoru lezada. Maski arguidu no lezada di'ak malu ona

maibé prokuradór konsidera tenke iha prevensaun regirozu ba arguidu hodi garantia arguidu la repete ninia hahalok iha futuru. Tanba ne'e, husu ba tribunál atu aplika pena prizaun fulan tolu suspende ba tinan ida.

Enkuantu parte defeza haktuir katak arguidu konfesa integralmente ba faktu sira iha akuzasaun, arrepende ninia hahalok, di'ak malu ona ho lezada no durante sira moris hamutuk arguidu foin primeiravés baku lezada. Tanba ne'e, husu ba tribunál atu aplika pena adekuaudu ba arguidu.

Desizaun

Depoizde avalia faktu sira hotu, tribunál prova faktu sira iha akuzasaun katak arguidu tuku dala tolu iha lezada nia kabaas parte karuk no dala tolu iha lezada nia kabaas parte loos. Tribunál mós prova katak arguidu uza ai-kabelak natoon ida baku dala rua iha lezada nia ain-kabun, tuku dala ida iha kanuruk no tebe dala barak iha kotuk laran. Bazeia ba prova sira ne'e no tetu ba sirkunstánsia atenuante sira hanesan arguida foin primeiravés mai hatan iha tribunál no di'ak malu ona ho lezada, tribunál kondena arguidu ho pena multa US\$120.00 ne'ebé arguidu sei selu US\$1.00 durante loron 120. Bainhira arguidu la selu pena multa ne'e, arguidu sei kumpri iha prizaun durante loron 80 nu'udar pena alternativu.

10. Krime ofensa ba integridade fízika simples ho natureza violénsia doméstika

Nú. Prosesu	: 0052/19. BCBCV
Kompozisaun Tribunál	: Singulár
Juis	: Dr. Ersilia de Jesus
Prokuradór	: Dr. Ambrosio Rangel Freitas
Defeza	: Dr. Sidónio Maria Sarmiento
Desizaun	: Pena multa US\$ 60.00

Iha 22 Novembru 2019, Tribunál Distritál Baukau prezide julgamentu leitura sentensa ba krime ofensa integridade fízika simples ho natureza violénsia doméstika ne'ebé envolve arguidu RdC hasoru nia feen, iha Distritu Baukau.

Akuzasaun Prokuradór

Prokuradór akuza katak iha 17 Abril 2019, iha oras tuku 21:00 kalan, arguidu basa dala rua iha lezada nia hasan parte karuk no parte loos no mós foti rai kafuak ida no tuda iha lezada nia kotuk laran. Hafoin arguidu rasta lezada ba uma laran. Lezada ba halo tratamentu iha Pradet Baukau. Antes akontesimentu, lezada hasee arguidu ne'ebé sai ba tuur ho nia kolega sira iha liur no la taka odamatan. Ho nune'e sira diskute malu no arguidu komete aktu sira ne'e hasoru lezada.

Prokuradór akuza arguidu kontra artigu 145 KP kona-ba krime ofensa ba integridade fízika simples ho moldura penál to'o tinan 3 ka multa, no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira no deklara katak sira di'ak malu ona no la baku ona lezada. Arguidu mós deklara katak foin primeiravés mai hatan iha tribunál no promete sei la halo tan krime hanesan hasoru lezada ka membru família iha futuru. Arguidu serbisu hanesan agrikultór ho rendimentu kada fulan US\$100.00.

Aleinde ne'e, lezada mós kontinua konfirma faktu sira iha akuzasaun no mós konfirma deklarasaun arguidu nian katak sira di'ak malu ona no to'o agora arguidu la baku ona lezada.

Alegasaun final

Prokuradór haktuir katak arguidu konfesa ninia hahalok no lezada mós konfirma faktu sira iha akuzasaun. Tanba ne'e, husu ba tribunál atu aplika pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

Entretantu, defeza husu ba tribunál atu aplika pena ne'ebé kmaan liu ba arguidu tanba arguidu konfesa faktu sira iha akuazasaun, arrepende ona ninia hahalok, foin primeiravés mai hatan iha tribunál no promete sei la repete ninia hahalok ne'e iha futuru.

Desizaun

Depoide avalia faktu sira, tribunál prova katak arguidu basa dala rua iha lezada nia hasan parte karuk no parte loos, arguidu foti rai kafuak ida no tuda ba iha lezada nia kotuk laran. Hafoin arguidu rasta lezada ba uma laran. Bazeia ba faktu provadu sira no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál no di'ak malu ona ho lezada, ho nune'e tribunál kondena arguidu ho pena multa US\$60.00 ne'ebé sei selu US\$1.00 kada loron durante loron 60. Tribunál mós fiksa pena alternativa durante loron 40 prizaun, bainhira arguidu la kumpri pena multa refere.

11. Krime ofensa ba integridade física simples ho natureza violéncia doméstika

Nú. Prosesu	: 0049/19. PDBAU
Kompo zisaun Tribunál	: Singulár
Juis	: Dr. José Quintão Soares Celestino
Prokuradór	: Dr. Bartolomeu de Araújo
Defeza	: Dr. Sidónio Maria Sarmiento
Desizaun	: Pena prizaun fulan 10 suspende ba tinan 1

Iha 25 Novembru 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu EGP hasoru nia feen, iha Distritu Baukau.

Akuzasaun Prokuradór

Prokuradór akuza arguidu katak iha 10 Juñu 2017, iha oras tuku 22:00 kalan, iha área ro-tunda vila nova Baukau, arguidu tuda lezada nia ulun dala ida ho botir mina morin nian, foti kadeira masa ida baku iha lezada nia kotuk laran to'o kadeira rahun. Hafoin arguidu tebe dala ida iha lezada nia kelen no lori tizora sona kona lezada nia liman rezulta kanek no ran. Maibé sira di'ak malu falifali no kontinua moris hamutuk nu'udar feen no la'en.

Iha 14 Abril 2018, iha oras tuku 22:00 kalan, arguidu tuku dala ida iha lezada nia matan fukun no tuku dala barak iha lezada nia kotuk laran.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba aktu sira ne'ebé akontese iha 10 Juñu 2017. Arguidu rekoñese katak nia tuku lezada dala ida iha ulun, dala ida iha ain no dala ida iha kidan. Maibé la uza tizora sona lezada. Depoisde akontesimentu ne'e, lezada halai tiha ba nia inan-aman sira hafoin arguidu ho nia família ba tuir lezada atu rezolve problema ne'e maibé lezada deside lakohi ona moris hamutuk ho arguidu. Arguidu mós deklara katak iha loron tuir mai, lezada ko'us sira nia oan no ba husik hela iha arguidu maibé lezada rasik arguidu la hetan.

Entretantu faktu sira ne'ebé akontese iha 14 Abril 2018, arguidu konfesa totalmente no deklara katak agora dadaun sira di'ak malu ona no moris hamutuk filafali nu'udar feen ho la'en. Arguidu mós deklara katak foin primeiravés mai iha tribunál, nu'udar motorista arguidu nia vensimentu kada fulan US\$200.00,

Entertantu, lezada konfirma faktu sira iha akuzasaun maibé deklara katak arguidu nia aktu uza tizora sona lezada nia liman ne'e la'os akontese iha iha 10 Juñu 2017 maibé akontese iha 14 Abril 2018. Aleinde lezada deklara katak lezada hein arguidu ho nia família sira atu rezolve sira nia problema ne'ebé akontese iha 10 Juñu 2017 refere maibé arguidu no nia família la mai rezolve.

Depoisde ne'e, iha Abril 2018, arguidu ba tuir lezada iha nia inan-aman sira no sira deside filafali ba sira nia hela fatin maibé iha 14 Abril 2018, arguidu halo fali agresaun hasoru lezada, tuku dala ida iha lezada nia matan fukun, tuku dala barak iha lezada nia kotuk laran no uza tizora sona iha lezada nia liman rezulta kanek no ran. Hafoin akontesimentu ne'e, arguidu no lezada hela separa kedas maibé la kleur deit sira di'ak malu fali no kontinua moris hamutuk hanesan feen ho la'en to'o agora.

Alegasaun final

Prokuradór konsidera arguidu provadu komete krime rua tuir faktu sira iha akuzasaun tanba arguidu konfensa ninia hahalok maski parsialmente no lezada deklara katak arguidu halo duni agresaun hasoru lezada. Tanba ne'e, husu ba tribunál atu kondena arguidu ho pena únika tinan ida suspende ba tinan rua.

Entretantu, defeza husu ba tribunál atu konsidera arguidu nia deklarasaun kona-ba faktu sira ne'ebé nia komete no sirkunstánsia atenuante sira hasoru arguidu hanesan arguidu foin primeiravés mai hatan iha tribunál, arrepende ninia hahalok, arguidu ho lezada mós iha vontade rasik moris hamutuk fali nu'udar feen ho la'en hodi haree ba sira nia oan nia futuru. Tanba ne'e, husu ba tribunál atu aplika pena ne'ebé kmaan liu ba arguidu.

Desizaun

Depoide avalia faktu sira, tribunál prova katak arguidu komete krime rua (konkursu) tanba komete krime dala rua hasoru lezada. Bazeia ba faktu provadu sira ne'e no tetu mós ba sirkunstánsia atenuante sira hanesan arguidu konfesa faktu balun, arrepende ninia hahalok, primeiravés mai hatan iha tribunál no di'ak malu ona ho lezada, ho nune'e tribunál kondena arguidu ba krime ne'ebé akontese iha 10 Juñu 2017 ho pena prizaun fulan haat no kondena arguidu ho pena prizaun fulan ualu ba krime ne'ebé akontese iha 14 Abril 2018. Husi pena rua ne'e, tribunál akumulá no aplika pena únika ba arguidu pena prizaun fulan sanulu suspende ba tinan ida.

12. Krime ofensa ba integridade física simples ho natureza violência doméstica

Nú. Prosesu	: 0045/18. VQSIC
Kompozisaun Tribunál	: Singulár
Juis	: Dr. José António de Jesus Escurial da Silva Faria
Prokuradór	: Dr. Domingos Gouveia Barreto
Defeza	: Dr. José Maria Caetano Guterres
Desizaun	: Pena multa US\$30.00

Iha 26 Novembru 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu JS hasoru nia feen, iha Distritu Vikeke.

Akuzasaun Prokuradór

Prokuradór akuza arguidu katak iha 24 Novembru 2018, iha oras tuku 16:00 lokraik, lezada ho liafuan maka'as haruka arguidu atu lori kalen taka kuak bee nian ne'ebé arguidu ke'e no lezada kontinua ko'alia bebeik kona-ba ne'e. Ho nune'e arguidu rasta lezada ba iha uma laran rezulta lezada nia liman no ain sofre kanek no lezada nia ulun kona bebak. Arguidu mós basa dala rua iha lezada nia tilun-hun parte karuk no tebe dala rua iha lezada nia ain parte karuk.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu ne'ebé mak prokuradór imputa ba nia, foin primeiravés komete krime, di'ak malu ona perante família no promete sei la repete ninia hahalok ne'e iha futuru.

Entretantu, lezada kontinua konfirma faktu sira iha akuzasaun no deklara katak sira di'ak malu ona no to'ó agora arguidu la baku ona lezada.

Alegasaun finál

Prokuradór haktuir katak arguidu provadu komete faktu hotu iha akuzasaun tanba arguidu konfesa no lezada kontinua konfirma faktu sira. Maski di'ak malu ona, arguidu nafatin hetan kondensasaun tanba arguidu nu'udar la'en ne'ebé tuir loloos iha responsabilidade atu proteje família maibé pelu-kontrariu halo fali agresaun hasoru lezada. Tanba ne'e, husu tribunál kondena arguidu ba pena prizaun tinan ida suspende ba tinan rua.

Entretantu, defeza husu ba tribunál atu aplika pena ne'ebé justu no adekuada ba arguidu bazeia ba sirkunstánsia atenuante sira hanesan arguidu foin primeiravés mai hatan iha tribunál, arguidu la repete ninia hahalok, serbisu hanesan agrikultór no sai sustentadór prinsipál ba família.

Desizaun

Tribunál prova katak arguidu rasta lezada ba iha uma laran rezulta kanek iha lezada nia liman no ain no ulun kona bebak. Tribunál mós prova katak arguidu basa dala rua iha lezada nia tilun-hun parte karuk no tebe dala rua iha lezada nia ain parte karuk. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan tribunál no di'ak malu ona ho lezada, nune'e tribunál kondena arguidu ho pena multa US\$30.00 ne'ebé arguidu sei selu US\$1.00 durante loron 30 inklui kondena arguidu selu kustu judisiál US\$10.00. Bainhira arguidu la selu pena multa ne'e, arguidu sei kumpri iha prizaun durante loron 40 nu'udar pena alternativu.

13. Krime ofensa ba integridade fízika simples ho natureza violénsia doméstika

Nú. Prosesu	: 0005/19. VQLLT
Kompozisaun Tribunál	: Singulár
Juis	: Dr. José António de Jesus Escurial da Silva Faria
Prokuradór	: Dr. Domingos Gouveia Barreto
Defeza	: Dr. Sidónio Maria Sarmiento
Desizaun	: Pena prizaun fulan 6 suspende ba tinan 1

Iha 26 Novembru 2019, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu LdR hasoru nia feen, iha Distritu Vikeke.

Akuzasaun Prokuradór

Prokuradór akuza arguidu katak iha 23 Feveireiru 2019, iha oras tuku 18:00 lokraik, arguidu ho lezada foin fila hosi mate uma, bainhira to'ó uma arguidu husu osan US\$0.50 ba lezada atu ba joga fali karta iha mate uma ne'e. Maibé lezada lakohi fó osan ba arguidu nune'e sira diskute malu no arguidu foti ai-bebak ida no baku dala ida iha lezada nia liman-fuan parte loos, baku dala ida iha liman-sikun parte loos, baku dala ida iha ain parte karuk, tuku dala ida iha hasan parte karuk, tebe dala ida iha kotuk laran, tuku dala rua iha tilun-hun no tebe tan dala ida iha kotuk laran to'ó lezada monu ba rai. Bainhira lezada monu ne'e, arguidu foti fatuk natoon ida no riba ba lezada nia kotuk laran.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'ó tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira kona-ba baku ne'e loos hotu maibé arguidu rejeita riba fatuk ba lezada nia kotuk laran. Arguidu mós deklara katak di'ak malu ona ho lezada no husu ona deskulpa ba lezada perante família rua. Arguidu arrepende ninia hahalok, promete sei la repete ninia hahalok iha futuru no depoisde akontesimentu ne'e, la baku ona lezada. Arguidu nu'udar agrikultór no arguidu mak sustenta família.

Entretantu, lezada kontinua konfirma faktu sira balun iha akuzasaun, konfirma mós arguidu nia deklarasaun katak arguidu la riba fatuk ba lezada nia kotuk laran no deklara katak sira di'ak malu ona no arguidu la baku ona lezada.

Alegasaun finál

Prokuradór haktuir katak arguidu provadu komete faktu sira apenas arguidu la riba fatuk iha lezada nia kotuk laran no lezada mós konfirma ida ne'e. Mezmu arguidu no lezada di'ak malu ona maibé arguidu tenke hetan kondensasaun tanba arguidu nu'udar la'en ne'ebé iha responsabilidade hodi proteje família maibé pelu-kontrariu halo fali agresaun hasoru lezada. Tanba ne'e, husu tribunál kondena arguidu ba pena prizaun fulan neen suspende ba tinan ida.

Entretantu, defeza husu ba tribunál atu aplika pena ne'ebé kmaan liu ba arguidu bazeia ba sirkunstánsia atenuante sira hanesan arguidu foin primeiravés mai hatan iha tribunál, arguidu la repete ninia hahalok ne'e, arguidu nu'udar agrikultór no sai sustentadór prinsipál ba família.

Desizaun

Depoisde avalia faktu sira, tribunál prova katak arguidu foti ai-bebak ida no baku dala ida iha lezada nia liman-fuan parte loos, baku dala ida iha liman-sikun parte loos, baku dala ida iha ain parte karuk, tuku dala ida iha hasan parte karuk, tebe dala ida iha kotuk laran, tuku dala rua iha tilun-hun no tebe tan dala ida iha kotuk laran rezulta lezada monu ba rai. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan tribunál no di'ak malu ona ho lezada, nune'e tribunál kondena arguidu ho pena prizaun fulan neen suspende ba tinan ida.

14. Krime ofensa ba integridade fízika simples ho natureza violénsia doméstika

Nú. Prosesu : 0011/19. VQOSU
Kompozisaun Tribunál : Singulár
Juis : Dr. José António Jesus Escurial da Silva Faria
Prokuradór : Dr. Bartolomeu de Araújo
Defeza : Dr. Grigório Maria Lourdes de Lima
Desizaun : Pena prizaun fulan 9 suspende ba tinan 1 fulan 6

Iha 26 Novembru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MdS hasoru nia feen, iha Distritu Vikeke.

Akuzasaun Prokuradór

Prokuradór akuza arguidu katak iha 27 Feveireiru 2019, iha oras tuku 18:00 lokraik, lezada fila ba uma no husik hela arguidu iha sira nia to'os ho distansia maizumenus kilometru rua husi sira nia uma. Bainhira arguidu fila ba uma, sira diskute malu no arguidu tebe dala ida iha lezada nia matan parte karuk, tebe dala ida iha matan parte loos no dala ida iha kotuk laran.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak lezada fila uluk ba uma no la bolu arguidu nune'e arguidu halo agresaun refere hasoru lezada. Arguidu deklara tan katak foin primeiravés mai iha tribunál, nu'udar agrikultór no ema ne'ebé mak responsavel hodi sustenta família. Arguidu hatutan katak di'ak malu ona ho lezada, arrepende ninia hahalok no promete sei la baku tan lezada iha futuru.

Entretantu, lezada continua konfirma faktu sira iha akuzasaun no deklara katak depoisde akontesimentu ne'e sira di'ak malu fali no to'o agora arguidu la baku ona lezada.

Alegasaun final

Prokuradór haktuir katak arguidu provadu komete krime hasosu lezada no konsidera katak lezada fila uluk ba uma karik atu prepara hahan ba kalan nian. Maibé importante katak arguidu nia promesa sai realidade hodi nune'e bele responsabiliza ba família nia moris. Tanba ne'e, husu ba tribunál atu kondena arguidu ba pena prizaun fulan lima suspende ba tinan ida.

Entretantu, defeza husu ba tribunál atu konsidera arguidu nia konfiksaun no sirkunstánsia atenuante sira hasoru arguidu hanesan arguidu foin primeiravés baku lezada, arrepende ninia hahalok no arguidu promete perante tribunál prontu fo protesau ba nia família iha futuro. Tanba ne'e, husu ba tribunál atu aplika pena ne'ebé adekua ba arguidu.

Desizaun

Depoide avalia faktu sira hotu, arguidu tebe dala ida ida iha lezada nia matan parte karuk, tebe dala ida iha matan parte loos no dala ida iha kotuk laran. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál no di'ak malu ona ho lezada, tribunál kondena arguidu ho pena prizaun fulan sia suspende ba tinan ida fulan neen.

15. Krime omisídiu agravadu no arma brankas

Nú. Prosesu	: 0002/19. BCBQI
Kompozisaun Tribunál	: Koletivu
Juis	: Dra. Florencia Freita, Dr. José Gonçalves no Dr. José Quintão Soares Celestino
Prokuradór	: Dr. Bartolomeu de Araújo
Defeza	: Dr. José Maria Caetano Guterres
Desizaun	: Pena prizaun tinan 18

Iha 26 Novembru 2019, Tribunál Distritál Baukau prezide julgamentu leitura akordaun ba krime omisídiu agravadu no arma brankas ne'ebé envolve arguidu AM hasoru RM nu'udar nia inan, iha Distritu Baukau.

Akuzasaun Prokuradór

Prokuradór akuza katak iha 17 Janeiru 2019, iha oras tuku 09:00 dadeer, lezada ho arguidu nia maun (LMM) fila hosi lezada nia maun nia uma. Bainhira iha dalan klaran atu ba sira nia uma adat, lezada no LMM hasoru arguidu ne'ebé kaer hela katana ida no hasee lezada ho LMM dehan “imi na'in rua ba ne'ebé?”. Iha tempu hanesan arguidu mós hateten ba LMM katak “diak liu ó sees tiha, selae hau ta mate hotu imi na'in rua”. Momentu rona arguidu ko'alia hanesan ne'e, LMM hatan ba arguidu katak “alin ita nia avo uluk la halo hahalok hanesan ne'e”. Hafoin ne'e, sira na'in tolu la'o hamutuk ba fali sira nia uma adat maibé tuir dalan arguidu tolok hela deit lezada, nune'e LMM la'o uluk tiha ba nia rezidénsia.

Bainhira lezada ho arguidu to'o iha sira uma adat nia okos, LMM husi distansia maizumenus metru 10, haree lezada hakuak arguidu nia ain atu nune'e arguidu la bele taa. LMM hakilar ba arguidu katak "ó labele hanesan ne'e, nia ita na'in rua nia inan". Maibé arguidu la rona no kontinua kaer lezada nia fuuk hafoin taa dala ida iha lezada nia kakorok to'o kotu kedas no lezada mate fatin. Haree ne'e, LMM tauk no halai hodi telefone ba família sira.

Prokuradór akuza arguidu kontra artigu 139 (g) KP kona-ba omisídiu agravadu ho moldura penál tinan 12 to'o tinan 25, konjuga ho artigu 20 (1) Lei Nu. 5/2017 kona-ba arma brankas.

Produsaun ba prova sira

Iha prosesu julgamentu, arguidu hili direitu nonook. Testemuña LMM nu'udar lezada nia oan mane ka arguidu nia maun depoimentu tuir faktu sira iha akuzasaun no hatutan katak testemuña telefone ba nia aman rasik no nia aman kontinua ba informa iha Eskuadra Polísia Baguia. Testemuña mós depoimenta katak arguidu iha ona antesidente kriminál, tama ona prizaun iha tinan 2015 to'o 2017 tanba na'ok motor.

Testemuña ABMS nu'udar Adjuntu Komandate Eskuadra Polísia Baguia depoimenta katak depoisde nia simu informasaun hosi lezada nia família, testemuña ba kedas iha fatin akontesimentu no haree lezada hatoba ona iha hadak leten. Testemuña kaer lezada nia ulun atu foti foto maibé derrepente lezada nia ulun monu tun ba rai. Iha tempu hanesan, testemuña mós kaptura arguidu ne'ebé iha fatin akontesimentu.

Alegasaun finál

Prokuradór haktuir katak mezmu arguidu hili direitu nonook maibé testemuña LMM haree direktamente bainhira arguidu taa lezada no testemuña ABS mós haree lezada nia kakorok kotu. Arguidu nia hahalok ne'e labele perdua tanba oho nia inan rasik ne'ebé hahoris nia. Arguidu iha antesidente kriminál. Ho nune'e, husu ba tribunál fó kondensasaun ne'ebé todan liu ba arguidu.

Enkuantu, defeza haktuir katak mezmu arguidu hili direitu nonook, husu tribunál atu haree prova sira iha audénsia julgamentu hodi fó justisa ne'ebé justu ba arguidu.

Desizaun

Depoisde avalia faktu sira, tribunál prova katak arguidu taa lezada nu'udar nia inan rasik to'o kakorok kotu no mate kedas iha fatin akontesimentu maski antes ne'e, lezada hakuak arguidu nia ain no arguidu nia maun hakilar husi dook no fó hanoin ba arguidu atu la oho lezada tanba lezada nu'udar sira nia inan. Maibé arguidu la rona no kontinua kaer lezada nia fuuk no taa dala ida iha lezada nia kakorok to'o kakorok kotu no lezada mate kedas iha fatin. Tribunál mós prova katak antes arguidu ta'a lezada, arguidu tolok dala barak lezada. Arguidu mós iha ona antesidente kriminál ba krime furtu agravadu tanba ne'e, konsidera arguidu laiha arrendimentu. Bazeia ba

prova sira, konsiderasaun sira no sirkunstánsia sira hotu, tribunál konklui no kondena arguidu ho pena únika tinan sanulu resin ualu iha prizaun.

16. Krime ofensa ba integridade fízika simples ho natureza violénsia doméstika

Nú. Prosesu : 0054/19.BCBCV
Kompozisaun Tribunál : Singulár
Juis : Dr. José António Jesus no Escurial da Silva Faria
Prokuradór : Dr. Ambrósio Rangel Freitas
Defeza : Dr. José Maria Caetano Guterres
Desizaun : Pena multa únika US\$22.50

Iha 26 Novembru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu SdC hasoru nia feen no oan, iha Distritu Baukau.

Akuzasaun Prokuradór

Prokuradór akuza katak 20 Abril 2019, iha oras tuku 07:00 dadeer, arguidu haruka nia oan hein kareta-tanki bee nian atu ense bee mós maibé to'o lokraik kareta-tanki la liu. Ho nune'e iha oras tuku 20:00 kalan arguidu haree bee laiha no arguidu foti ai-sar dasa uma laran nian no baku dala barak iha nia oan ne'e nia isin. Haree arguidu baku sira nia oan ne'e, arguidu nia feen hasee atu la bele baku. Nune'e, arguidu ho ai-sar refere baku dala ida iha nia feen nia sorin parte loos.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, no konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa integralmente ba faktu hotu ne'ebé mak prokuradór imputa ba nia no deklara katak sira forma família iha 2004 no iha oan na'in tolu, maibé foin primeiravés baku lezada sira no hatan iha tribunál. Arguidu deklara katak di'ak malu ona ho lezada sira, arrepende ninia hahalok no promete sei la repete ninia hahalok ne'e iha futuru. Arguidu serbisu nu'udar negosiante fa'an modo iha merkadu ho vensimentu kada fulan US\$60.00, hodi sustenta família.

Entretantu, lezada na'in rua kontinua konfirma faktu sira iha akuzasaun no deklara katak sira di'ak malu ona no to'o agora arguidu la baku ona lezada sira.

Alegasaun finál

Prokuradór haktuir katak iha produsaun ba prova sira arguidu konfesa totalmente faktu sira ba tribunál no lezada sira konfirma faktu sira iha akuzasaun. Tanba ne'e, konsidera arguidu provadu komete krime rua hasoru lezada sira no husu ba tribunál atu aplika pena únika tinan ida fulan neen suspende ba tinan tolu.

Entretantu, defeza husu ba tribunál atu aplika pena ne'ebé adekuaudu ba arguidu bazeia ba sirkunstánsia atenuante sira hanesan arguidu foin primeiravés mai hatan iha tribunál, arrepende ona nia hahalok no di'ak malu ona ho lezada sira, arguidu la repete ona ninia hahalok, serbisu nu'udar negosiante faan modo iha merkadu no sai sustentadór prinsipál ba família.

Desizaun

Tribunál prova katak arguidu foti ai-sar baku dala barak iha nia oan nia isin-lolon no mós prova baku nia feen ho ai-sar refere iha nia isin sorin parte loos. Bazeia ba faktu provadu sira ne'e no tetu ba sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál no di'ak malu ona ho lezada sira, nune'e tribunál kondena arguidu ho pena multa únika US\$22.50 ne'ebé arguida sei selu 0.50 kada loron durante loron 45 inklui kondena arguidu selu kustu judisiál US\$10.00. Tribunál mós fiksa pena alternativa durante loron 30 prizaun, bainhira arguidu la kumpri pena multa refere.

17. Krime ofensa ba integridade fízika simples ho natureza violénsia doméstika

Nú. Prosesu : 0015/19. BCLGA
Kompozisaun Tribunál : Singulár
Juis : Dr. José Quintão Soares Celestino
Prokuradór : Dr. Ambrosio Rangel Freitas
Defeza : Dr. António Fernandes
Desizaun : Pena multa US\$22.50

Iha 26 Novembru 2019, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida EX hasoru nia la'en, iha Distritu Baukau.

Akuzasaun Prokuradór

Prokuradór akuza katak iha 09 Abril 2019, iha oras tuku 17:00 lokraik, arguida foti ai maran ida no baku dala ida iha lezadu nia ulun parte kanuruk nian, baku dala ida iha kotuk laran to'o ai tohar. Arguida mós kamat lezadu nia inus no kakorok. Lezadu ba halo tratamentu iha Sentru Saúde Atelari. Antes akontese, arguida no lezadu diskute malu kona-ba arguida halimar *whatsapp* ho mane seluk no lezadu toman no hasee.

Prokuradór akuza arguida kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguida konfesa faktu sira iha akuzasaun prokuradór nian no deklarata katak depoisde lezadu fila hosi polísia no tratamentu iha sentru saúde, arguida husu deskulpa ba lezadu. Arguida mós deklarata katak desde forma família iha tinan 2012, iha ona oan na'in haat,

arguida foin primeiravés baku lezadu. Arguida arrepende ninia hahalok no promete sei la baku tan lezadu. Arguida nu'udar delagada ba aldeia nian no vensimentu kada fulan tolu US\$90.00.

Aleinde ne'e, lezadu mós konfirma faktu sira iha akuzasaun inklui konfirma mós deklarasaun arguida nian katak sira iha oan na'in haat no arguida husu ona deskulpa no mós la baku ona lezadu.

Alegasaun final

Prokurador haktuir katak arguida halo agresaun hasoru lezadu nu'udar nia la'en no arguida nu'udar delegada aldeia loloos fó ezemplu di'ak ba nia comunidade maibé pelu kontráriu. Tanba ne'e, husu ba tribunál atu aplika pena multa ba arguida US\$15.00 ne'ebé arguida sei selu 0.50 kada loron durante loron 30. Tribunál mós fiksa pena alternativa durante loron 30 prizaun, bainhira arguidu la kumpri pena multa refere.

Entretantu, defeza husu ba tribunál atu konsidera arguida nia konfiksaun ba iha faktu sira, arrepende ona ninia hahalok, diak malu ona ho lezadu no foin primeiravés mai hatan iha tribunál. Tanba ne'e, husu ba tribunál aplika pena ne'ebé justu ba arguida.

Desizaun

Depoide avalia faktu sira hotu, tribunál prova katak arguida foti ai maran ida no baku dala ida iha lezadu nia ulun parte kanuruk, baku dala ida iha kotuk laran to'o ai-tohar, kamat lezadu nia inus no kakorok. Bazeia ba prova sira ne'e no sirkunstánsia atenuante sira hanesan arguida foin primeiravés mai hatan iha tribunál no di'ak malu ona ho lezada, tribunál kondena arguidu ho pena multa US\$22.50 ne'ebé arguidu sei selu US\$0.50 durante loron 45. Bainhira arguidu la selu pena multa ne'e, arguidu sei kumpri iha prizaun durante loron 30 nu'udar pena alternativu.

Atu hetan informasaun kle'an liu tan favor kontaktu:

Casimiro dos Santos

Diretór Interinu JSMP

E-mail: santos.cas76@gmail.com | casimiro@jsmp.tl

Website: <http://jsmp.tl/>

Telefone: 3323883 | 77257466